

國立北京大學研究
院文史叢刊第一種

崇禎存實疏鈔

卷三下

THE UNIVERSITY OF CHICAGO PRESS

兵部尚書臣張鳳翼等謹

題爲流寇再犯濟西官兵奮勇殺退恭報情形并陳未盡事宜仰祈

聖鑒事職方清吏司案呈奉本部送崇禎陸年正月初柒日兵科鈔出河南巡撫今戴罪樊尚燝題前事內稱臣自玖月貳拾陸日北發拾壹月初貳日渡河初陸日抵駐衛輝賊騎漸遯計在衛月餘調到各道兵招募毛鹽兵與分布守隘已詳列前疏不敢復贅迄今近叁月矣雖地方粗安難民漸復百計嚴防幸無一賊入境然兵以分守而成弱餉以日久而難繼加以今歲水災異常旣懼寇迫又慮兵饑更虞民竊盜起內地洶洶且中州素不知兵事事從新做起臣日夜憂心如焚每念及不覺汗浹於背計惟有速圖

夾擊先除外患徐弭內憂按臣曾倜與臣往返計畫備極苦心一面發賑災黎一面擊冰防河一面措處兵餉凡可以計安兩河仰紓

皇上宵旰之憂者敢不惟力是視無奈賊乍近乍遠兵亦忽東忽西如拾壹月貳拾貳日據分巡河北道右叅政降貳級管事祝萬齡呈接冀南道潞安告急之報稱賊迫陵川至緊聲言東犯輝縣南犯修武急請大兵合剿等因巡道請令守磁遊擊翁英都司陳治邦督兵出黎城臣卽令原任副總兵許定國督兵出壺關及兵冒險抵晉而賊又遯合陽城垣曲忽犯濟源之西界矣懷濟一帶岐路甚多素稱難守爲賊必窺之地時分守河北道左布政使今降參級戴罪尹伸躬臨濟源已先督防濟官兵備於境上拾貳月

拾叁日得道府塘報諸賊果犯濟源近界之西陽河於初
拾日適於防濟官兵相遇殺賊大敗臣卽是日厚犒昌鎮
副總兵左良玉官兵一同俱到懷慶據該道行文覆察拾
玖日報據懷慶府監紀同知張汝開呈報遵奉憲票職於
拾柒日親詣邵原覆察得拾貳月初柒捌等日先據千戶
傅三聘典史王舜賡陸續探得賊在山西垣曲地方漸近
濟源縣境隨蒙本道急發撫院原撥防濟肆營兵馬親督
勦禦又蒙本道急檄守備蔡如薰從府提兵策應如薰初
拾日辰刻卽抵王屋山是日賊犯西陽約有貳萬幸本道
先發肆營兵馬適到賊據山頭我兵陣河阜河南營中軍
曹鳴鶚先到先戰舊標營千總連穩李春貴鋒營守備趙
之蘭鹽兵守備程君恩董震等俱各到齊合營力戰賊發

精騎衝陣我兵發大砲擊死兇賊約叁百餘雖遵令不割首級然屍橫血漬歷歷可驗交戰之殷自辰及酉幾叁拾陣連穩馬中壹箭奪賊壹馬李春貴身中貳箭督陣旗牌官趙邦佐喝斬壹賊各官同心向前無一退後而守備蔡如薰與本道及卑職汝開會於王屋行至東陽聞賊分兵越險將繞肆營之後如薰卽回東陽放砲揚威賊聞而退賊將打死屍骸乘夜擡去次日拾壹日又驚之於邵原賊遂潰散肆營兵亦因賊逃撤回邵原與如薰合營而賊之精銳幾盡矣拾貳日遣有馬賊米名在峪子里肆營兵追射斬壹賊勝後又復有此要之此壹役也諸將推狂突之鋒以保肆境如薰過潛伺之狡以護肆營若非本院厚集雄師本道決機布置亦烏能一擊大勝如是神速也等因

到道案炤先據營兵曹鳴鶚連穩李春貴報稱初拾日卯時
至西陽河遇流賊約數貳萬在於西山官兵相與對敵用砲
打死無數斫死亦多遵奉憲諭俱未割級賊將千總李春貴
右眉左腿中箭各兵馬輕重傷壹百餘名匹等因又據營官
趙之蘭曹鳴鶚連穩李春貴程君恩董震朱夢龍郭承宗等
報稱初拾日流賊老營屯扎西陽山頭我兵肆營合扎山下
賊自辰時下來先攻箭射參角各官率兵力堵衝戰參拾餘
陣大砲打死無數斫死亦多遵諭不許爭搶割級恐誤大事
有近營中砲賊壹名旗牌官趙邦佐喝令家丁毛得有割首
千總李春貴中箭肆營馬步兵中箭捌拾餘名戰馬中箭參
拾餘匹得賊箭參千餘枝殺至日中賊衆勇猛旗牌趙邦佐
持槍督率衆兵丁喊叫奮勇大小砲手馬步各兵蜂擁齊呼

趕殺賊勢大敗又督陣官劉懷德率兵參百名在東山頂放
砲助勢喊呼壓頂截賊趨路又聞蔡如薰應兵已來令兵大
呼蔡兵肆千助戰賊衆大敗直奔西山頂上衆官見天色黑
不敢前進戍時方收兵暗拔營上東山頂一日一夜人馬全
然未得飲食苦不能言我兵殺至山下天黑賊在山上叫道
我不知是你河南境不必苦殺我就退回賊首老回頭戴
紅纓帽親攻西面又壹賊首報係紫金梁騎栗色長大馬
紅踢冒戴帽套攻西南角後換青馬攻北面賊懼我兵追
殺乘夜不敢放火擡屍暗避深山等情據此尚未敢盡據
轉報復行監紀同知張汝開詳察據報前因該本道看得
賊之營古塚也去濟界聖佛頭僅貳拾里乃初拾日之來
不從聖佛大路而取間道出西陽之西山欲繞我兵之後

妄意出奇也而不意曹鳴鶚連穩李春貴趙之簡程君恩
董震等接踵到西陽恰與之相遇而戰賊見我兵力戰
不退又以壹枝復繇楊樹林小路徑下東陽仍欲出我
兵之後而又不意蔡如薰之兵自懷慶發卽到東陽陣
於東陽山頭賊遂不得東下山鬼伎倆兩出而兩不遂
督陣官趙邦佐劉懷德等傳布兩院之令催督愈嚴而曹
鳴鶚趙之簡連穩李春貴朱夢龍等之戰益力自辰至酉
壹日參拾餘合大砲打死約參百餘賊賊始不支而退是
役也賊實有衆貳萬西陽官兵僅壹千玖百蔡如薰兵僅
壹千本道與同知張汝閏領守備夏國鍵王家通湯有光
等官兵僅參百餘名遂爲聲勢於王屋其餘調援之兵如
遊擊越效忠親營中軍馬擢嵩盧營守備張應鰲皆未到

而賊已退矣至未報賊級實緣奉本院之令不敢貪級誤
事據監紀官報山坡見有橫屍血痕不爲無據是日以少
擊衆各官無不奮勇者而曹鳴鶚連穩李春貴之戰尤力
卽鳴鶚部兵輕重傷者共伍拾叁名較各營獨多連穩馬
中流矢李春貴眉腿帶傷此亦其確據矣蔡如薰雖未及
戰於西陽而東陽鼎峙使賊不得斷我兵爲貳亦最得力
相應竝報等因到臣爲炤賊以西兵追急仍如玖月故智
一擁齊來從各口浸入爲數不下貳萬我官兵僅近貳千
乃能酣戰竟日用砲擊死無數兼以砍殺亦多雖遵禁不
敢割級而山谷之間橫屍血清歷有可驗且被傷官兵馬
匹尤爲交鋒確證各營官員如曹鳴鶚連穩李春貴趙邦
佐等之奮勇當先趙之蘭馬擢程君恩董震朱夢龍郭承

宗等之合力堵殺與蔡如薰之應調卽至揚兵東陽使賊
不得行從後包裹之計尤爲出奇制勝謀略過人者也此
番以少擊衆兵家所難而守道尹伸之調度有方同知張
汝開之稽察詳明懷慶府知府別如綸之餽糧神速皆勞
不容泯者也賊窮西遯復羣聚於高平之間臣終不敢徂
濟源之小捷遂忘進剿之大司擇拾貳月拾玖之吉親詣
懷慶演武場誓師偏犒間又據山西分巡冀南道副使王
肇生差人齎稟內稱拾捌日接河北守道尹伸移文內云
大兵已集拾玖日誓師貳拾壹貳可以北來職等捧讀之
下恭稔本院憫此潞澤實切痼瘼惟飭各州縣預備糧芻
望雲以待本日酉時據哨探報稱賊大隊俱至高平城下
與李阜陶進相持而自陽城踵至者又未可以數計高平

危在旦夕陽城又爲賊梗此時西北貳路俱已斷絕告急
無門所恃以立救危急者惟河南官兵耳伏乞卽於誓師
之日諭令各兵兼程前來卽大兵一時未齊合無先發昌
平壹枝或別有騎兵速來接濟等情陽和總督臣張宗衡
來書激切相同據此隨委守道尹伸帶領親丁壹百叁拾
肆名爲各營監軍令副總兵左良玉領昌營官兵貳千叁
百捌拾玖員名令遊擊越効忠領毛營官兵壹千肆百壹
拾伍員名令守備李璿璣千總王從書等領毛營官兵壹
千壹百捌拾員名令守備錢繼功領毛兵叁百貳拾陸名
合之臣標下官丁約近陸千之數自懷慶次第前進徑往
山西澤州一面移文山西督撫監按諸臣督同彼中官兵
前來高平近賊之處與臣官兵約期合剿外事係奉

旨夾擊合宜具

聞抑臣於此而更有

請者昌鎮之兵原係中州鄉紳公疏呼籲

皇上特允所

請調發此中用以固腹心之重地通南北之咽喉爲中州實爲天下也一切行糧銀已於河南額解銀內兌給壹月是兵卽河南之兵餉亦河南之餉一旦以賊不入境樞臣移緩就急題

請以左良玉之兵聽晉中督撫調度征勦自屬苦心但賊近犯濟源豫境非盡無事加以昌兵與臣兵皆過晉駐澤州適中之地北可以援高平長子東可以接陵川潞安西可以應陽城沁水爲晉中炤管許多地方兼可以保固濟源臣

之心力盡矣若昌兵聽晉調度萬一調去深入賊穴窺河
北遠不及顧是以救中州者反以禍中州於

聖明發兵之初意不大孤乎臣愚謂山西以西宜屬之秦中兵
將向東追勦山西以東宜屬之河南及昌鎮兵將向西截
殺而以山西之兵將從中邀擊賊雖狡當無噍類矣行臣
之言斷宜以昌兵專駐澤州聽西兵追來於附近往來迎
擊既可爲晉中勦除又可爲河北保固計之兩得者也昌
鎮之兵乞

恩仍付臣調度彼此兩全若專聽晉中臣權不能行空費如許
餉搞不能得其一臂待疎虞而後呼籲計亦晚矣況此時
仍爲晉中殺賊聽臣調度猶之聽晉調度也萬惟

聖明垂察

俞允幸甚卽以昌鎮兵專屬河南然主兵萬餘參月來留餉陸
萬金業已費盡此時正在攢眉束手加以客兵貳千參百
捌拾有奇萬萬力不能支更祈

聖恩勅下戶部炤原部文內於河南解部額餉內充支銷算更
懇乞

聖恩量留數萬金以給主兵則目前可救燃眉日後更便銷算
臣得一意辦賊矢殲此以報

明命若不計留餉而徒言行兵是以畫餅止兒啼必不得之數
也無言滅賊矣尤可慮者太行險阻餽運拾分艱難今參
省之兵已集臣兵在晉遵奉屢

旨終不敢深入而忘內顧亦不敢久駐而犯師老倘西兵不及
此時急爲追殺則夾擊之功不成枵腹之兵空返徒爾勞

費寇殲何日之有晉諸臣雖素屬同心更乞

天語申飭丁寧窮寇乃可計日靖也臣一片血誠誓不與此賊俱生

請兵

請餉總爲兩省救此封疆非爲兩河私也事急矣計窮慮迫不得不哀鳴於

君父之前伏惟我

皇上鑒臣之愚

勅部立覆施行等因崇禎陸年正月初陸日奉

聖旨該部看議速奏欽此欽遵鈔出到部送司案呈到部除請餉聽戶部議覆外看得議調昌兵原爲援豫嗣以修武清化之寇遞入平陽晉中所在披猖而河南適有欲止客兵

之議臣部念干擬往返跋涉爲艱況澤潞之間正資勦禦因有左良玉聽晉督臣調度之

請夫亦爲山西賊滅而後中州得高枕無虞耳今撫臣樊尚燝疏稱兵駐澤川北可以援高平長子東可以接陵州潞安西可以應陽城沁水又謂秦兵向東追勦豫兵向西截殺山西兵從中邀擊賊雖狡當無噍類此誠萬全之策也今因賊犯濟源請左良玉仍歸調度相應允從然臣部猶有進於此者夫賊以流名原無定在萬一別從間道轉入天中左良玉貳千步兵豈能辦數十萬之賊卽晉中兵將亦應聽豫撫臣調遣而曹文詔參千精銳更當捲甲疾馳矣總之秦晉豫雖有分土分民然以

朝廷視之不得作彼此觀也所願參省文武諸臣同心合力早